

**Date – 30/07/2024**

**Time - 7:30 -7:40Hrs**

**REGIONAL NEWS BULLETIN**

**HEADLINES (MORNING)**

- 1. Revenue Minister B. Lalchhanzova'n tunlai thiamna hmangin Mizo mipuite tana awlsam leh chak zawka hna thawh a ni dawn tih a sawi.**
- 2. Kolasib Fast Track Court chuan kum tling lo pawngsualtu Lalpekthanga chu kum 20 chhung hrehawm taka Jail tang tura hremna thupek nimin khan a tichhuak.**
- 3. Lok Sabha Leader of Opposition Rahul Gandhi chuan caste census neih leh loneitute tana dan tlawhchhana MSP siam a phut**
- 4. Union Home Ministry chuan Delhi-a coaching centre pakhata UPSC exam inbuatsaih lai thih chungchang chhui tur committee a din.**



**REV. MINISTER PRESS CONFERENCE**

**Revenue Minister B. Lalchhanzova'n tunlai thiamna hmangin Mizo mipuite tana awlsam leh chak zawka hna thawh a ni dawn tih a sawi.**

**Nimin khan Pu B. Lalchhanzova hian a Pisa-ah chanchinbu mite a kawm a. Ram chhinchhiahna mumal taka siam a nih theih nan hmalak a ni dawn tih sawiin, LSC hming thlak, ram teh, house pass dil, surveyor detailment leh a dangte chu online hmang leh Common Service Centre kal tlangin dil theih a ni dawn, a ti a. AMC chhungah Online Land Tax Payment kalpui mek a ni tih sawiin, Mizoram pumah pawh kum 2025 ral hma ngeiin Online Tax Payment kalpui a nih theih nan hmalak mek a ni, a ti bawk.**

**Revenue Minister chuan surveyor indaihlohna phu-hruk a nih theih nan surveyor lak belh a nih tur thu leh sorkarin private surveyor Empanel Firm an chhawr tur thu a sawi a. District thar pathum - Saitual, Khawzawl leh Hnahthiala Revenue Office te chu thuam chak an ni dawn tih sawiin, hna thawktu pawh lak tura ruahmanna siam a ni, a ti.**

**Pu B. Lalchhanzova chuan Aizawl Municipal Corporation (AMC) huam chhunga House Pass dilna form Minister hnena dil ngai thin chu mipui te tana awlsamna ngaihtuahin tihtawp a nih thu a sawi a. Heng bakah hian Revenue Dept chuan Central Sector Scheme chak zawka kalpui a nih theih nan Digital India Land Record MoDernisation Programme (DILRMP) leh Survey of Villages and Mapping with Improvised Technology in Village Areas (SVAMITVA) te a kalpui mek a ni, a ti.**

Mipui tana thil awlsam zawk tur ngaihtuah a ni thu sawiin Minister chuan Aizawlah Settlement Office North leh South siama Geographical Area fel fai taka neih a nih theih nan hmalak niin Aizawl District-a khua leh veng te chhim leh hmara thenin mahni awmna veng lama office dawr tura ruahmanna siam mek a ni, a ti.



#### CYCLONE REMAL VICTIM COMPENSATION

Women & Child Development (WCD) hnuai scheme pahnih, Mission Vatsalya leh Mission Shakti-te kaltlangin Cyclone Remal vanga vanduin leh harsatna tawh zing naupang 41 te chu nimin khan Social Welfare, Tribal Affairs, Women & Child Development Department Minister Pi Lalrinpui'n chhawmdawlna a hlan.

Minister chuan khuarel chhiatna tuartu naupangte chu 'The Juvenile Justice (Care and Protection of Children) Act, 2015' chuan a bika enkawl leh venhim ngai a tihte zing ami an nih avangin ngaih pawimawh an ni, a ti a. Sawrkar atanga tanpuina awm ang angte hmanga tuamhlawm an nih tur thu a sawi a ni.

Aizawl District Child Protection Unit leh Child Welfare Committee chuan kumin May ni 31 atanga July ni 5 chhung khan Aizawl leh a chhehvel hmun hrang hranga Cyclone Remal-in chhiatna a thlen tuartu naupangte zirchiangin he chhiatna thlengin a nghawng zingah hian naupang 96 an tel tih an finfiah a. He chhawmdawlna programme-ah hian Mission Shakti hnuai Beti Bachao, Beti Padhao (BBBP) atangin hmeichhe naupang 28 te SSA Account hawsak an ni a. Naupangte'n ei leh in tur tha an neihna tur te, an lehkha zirna puitu tur leh hriselna tha an neih theih nana an inenkawl nan Mission Vatsalya hnuai Juvenile Justice Fund atangin naupang 16 te kum khat chhung atan thla tin Cheng 2,000 theuhin sum leh paia chhawmdawlna pek an ni a. Heng bakah hian naupangte hi gift package pek niin, mi inphalte'n stationery item-te an pe bawh a ni.

He hun hmannaah hian Directorate of Women & Child Development leh Aizawl Head Post Office-a thawktute an tel a ni.



#### RAPIST CONVICTED

Kolasib Fast Track Court Judge, Pu R.Vanlalena chuan kum tling lo pawngsuatu Lalpekthanga chu kum 20 chhung hrehawm taka Jail tang tura hremna thupek nimin khan a tichhuak.

Kum 2021, February ni 28 zan dar 7 bawh vel khan pawngsuatu hmeichhe tleirawl hi an chhungte birthday lawm zo a haw kawngah Lalpekthanga hian lo lambunin Thingdawl khaw dai huan thlamah a hruai lui a. Chutah chuan vau betin a pawngsuatu a. He thil thleng hi pawngsuatu tuartu

chhungle'n Kolasib Police Station-ah FIR theh lutin Police-in an chhui nghal a. Pawngsualtu Lalpekthanga (kum 32), Thingdawl Vengthar hi an man nghal a ni.

Police ten thu an zawh fiah hnu leh tul dang zawng zawng an tih fel hnuah Court-ah charge sheet theh luh a ni a. Police hian thuhretu 14 an nei a, pawngsualtu Lalpekthanga pawhin a thiam thu sawipuitu mi 3 a nei ve bawk.

Thuhretute thu a zawtfiah vek hnuah Court chuan Lalpekthanga hi hrehawm taka kum 20 chhung Jail tang tur leh pawisa Cheng 7,000 chawi turin a ti a; pawisa chawi tur hi a nei lo a nih chuan thla 3 dang Jail tang turin a ti bawk.

<><><>

ADC

Tunhnaia Aizawl leh Delhi tlawha zin Lai Autonomous District Council Chief Executive Member (CEM) leh Deputy Chairman ten nimin khan Lawngtlaia thu thar thehdarhtute kawmin an zinchhuahna chuan rah duhawm a chhuah ngei an beisei tih an sawi.

CEM pisaa chanchinbumite an kawmnaah CEM Pu C. Lalmuanthanga chuan Mizoram sorkara Tourism Minister Pi Rinpuii hnenah LADC huam chhunga Toutist Lodge-te chu LADC enkawlina hnuahia dah tura an thlen chu Minister chuan a lo dawngsawng tha hle tih sawiin, a hmunhma erawh State sorkar kutah la awm zui se a duh thu Minister hian a lo hrilh a ni, a ti a. UD&PA Director Pu Andrew H.Vanlaldika hnenah UD&PA hmalakna tam zawk Lawngtlai khawpuiah hnuh luh a nih theih nan rawtna an thlen te, Minister dang bakah Governor hnena an mamawh an thlen te chu tha taka an lo dawnsawnaah CEM chuan lawmthu a sawi.

Pu C. Lalmuanthanga chuan Delhi-a an cham chhungin Hmarchhaka Autonomous District Council ten thuneihna sang zawk an neih theih nana hmalak zel dan tur ngaihtuahin Autonomous District Council hruaitute an inhmukhawm tih sawiin, Union Home Minister bakah mipawimawh dang an hmuhte chuan ruahmanna an lo siam te tha an tihpuiin a hun tur sawi lawk theih ni lo mah se Autonomous District Council ten thuneihna lian zawk an neih theih nan Central sorkar chu a phurin a hlawhtlin ngei beiseina an nei lian hle, a ti.

LADC Deputy Chairman Pu H. Lalmuansanga chuan Autonomous District Council ten thuneihna lian zawk an neih theih nana an nawr zingah mipui nawlpuiin Direct Finance tia an hriat chu sorkar kaldanah Direct-in Central leh Autonomous District Council te chu state sorkar kaltlang lovin sum chungchangah an indawr a rem lova, State sorkar atanga an budget turte ruahmanna awm thin chu her danglam hretin sorkar laipui sum bawmah Autonomous District Council te chanvo tur dah chu an duh ber a ni tih sawiin, chu chuan State sorkar thlawhkhum lam a kawk lova, State sorkar tan pawh a zangkhai phah zawk dawn a ni, a ti.

<><><>

LAWNGTLAI – HUMAN TRAFICKING

Ramri hrula naupangte himna tur nimin khan Lawngtlaiah zirho a ni.

National Commission for Protection of Child Rights (NCPCR), State Commission for Protection of Child Rights (SCPCR) leh District Administration huaihawt he zirhona hun kaihruitu SDO (S) Pi Margaret J. Vanlalremmawii chuan, Lawngtlai District bakah Mizoram pum huap ang pawhin ‘child trafficking case’ tam lo hle mah se khawvel hmun hrang hrangah a hluar tawh hle a, tun atanga thahnemngai taka a inven dan tur lo hriat chian a pawimawh hle, a ti a. A bikin Lawngtlai district-ah Myanmar leh Bangladesh nena inrina ramri a awm avangin thenawm ram atanga naupang rukbo awm thei reng a ni tih hriaa mi tin an inralrin a tul hle, a ti a. Mizorama chengte hian thuneitute hnena thil thlen vat an ngai pawimawh tawk lo hle tiin a rang thei ang bera thuneitute hrilh kawngah harh thar a tul tak zet, a ti.

Zirhonaah hian Judicial Magistrate 1st Class, Civil Judge, Lawngtlai District Legal Services Authority Pu C. Lalremsanga’n kalkhawmte a zirtir a. Mihring ru boa hralh chu khawvela Dan lova sumdawna hluar ber pathumna a ni, a ti a; sum leng vak Dollar tluklehdingawn 32 vel a awm mek tih sawiin, hei hian human trafficking chungchang hriat chian a pawimawh zia a tilang chiang hle, a ti a. Dan lova mihring emaw naupang emaw lei leh hralh chu thil thleng reng a nih avangin chutiang laka inven dan leh hmalak dan tur hriatchian a tul hle, a ti a. National Crime Record Bureau (NCRB) te chhinchiah danin India ramah kum 2022 khan Dan lova mihring lei leh hralh case 6036 awmin, chung zinga 2878 chu naupang lei leh hralh case a ni, a ti. Dan lova puitling emaw naupang emaw lei leh hralh hian hluar lam a pan zel nia a hriat thu sawiin, dan kengkawhtute mai ni lovin mipui zawng zawng tanghova, theihtawp chhuaha do a hun tawh tak zet a ni, a ti.

Zirhonaah hian Danin ‘Human trafficking’ a hrilhfiah dan te, Naupangten Indian Constitution- a dikna chanvo an neih hrang hrangte leh Dan hmanga hmalak dan kawng hrang hrangte zirho a ni.

<><><>

## UPSC

Union Home Ministry chuan Delhi-a coaching centre pakhata UPSC exam inbuatsaih lai thih chungchang chhui tur committee a din. He committee hian Rajinder Nagar-a Coaching Centre-a kal mek thihna chungchangah hian a thihchhante, mawhphurtu bakah an kalphung thlak ngaite a zirchiang dawn a. He committee ah hian Urban Affairs Ministry Additional Secretary te, Delhi sawrkara Principal Secretary, leh Delhi Police Special CP te member zingah an tel a. Ni 30 chhungin an report an thehlut ang

<><><>

## RAHUL GANDHI

Lok Sabha Leader of Opposition Rahul Gandhi chuan caste census neih leh loneitute tana dan tlawhchhana MSP siam a phut. Nimina union budget sawihonaah he thu hi sawiin Pu Gandhi cuan loneituten dan tlawhchhan Minimum Support Price an neih chuan nasa takin an hlawkpui ang a ti a. Agniveer Scheme sawiselin scheme kalpui a nih danah sawrkar na takin a dem a ni.

<><><>

## PARIS OLYMPIC

Paris Olympic neih mekah India mipa hockey teamte chuan pool B inkhelah Argentina nen an inhnehtawk a. India mipate hian Ireland an tum leh dawn a. Tunah hian Pool B ah palina an ni mek a, Quarter final lut turin a sang pali ah an awm a ngai a ni.

Hetihlai hian mipa badmintonah India aiawh Lakshya Sen chuan Group L ah hnehna a chan hmasak ber a tawng a. Belgium mi Julien Carraggi a hneh a. Sena hian naktuk hian Asian champion Jonatan Christie group match hnukung berah a tum leh ang.

